



SULTAN SHARAFUDDIN IDRIS SHAH (tengah) menyerahkan Ijazah Doktor Falsafah Pendidikan Teknikal dan Vokasional kepada Noor Asmat Hassan balu graduan, Hazriil Azmin Saaari yang meninggal dunia akibat kanser sambil diperhatikan Dr. Mohd. Fauzi Ramlan (tiga dari kiri) semasa Majlis Konvokesyen UPM Ke-38 di UPM Serdang, Selangor, semalam.
- MINGGUAN/MOHD. NAJIB MOHD. NOR

Graduan mesti memiliki daya kepemimpinan, komunikasi berkesan

Manfaatkan ilmu demi kesejahteraan negara

Oleh **RODELIO JUNJUN TAUCAN**

rodelio.taucan@utusan.com.my

■ **KUALA LUMPUR 1 NOV.**

SULTAN Selangor, Sultan Sharafuddin Idris Shah mengingatkan setiap graduan supaya memanfaatkan ilmu yang dimiliki dengan menyumbang kepada masyarakat demi kesejahteraan negara.

Baginda yang juga Canselor Universiti Putra Malaysia (UPM) bertitah, ilmu yang dimiliki bukan untuk kepentingan peribadi semata-mata tetapi perlu digunakan dalam mentadbir urusan persekitaran dan kekayaan sumber alam demi kebaikan manusia sejagat.

Menurut baginda, setiap graduan mesti memiliki daya kepemimpinan dan komunikasi berkesan serta semangat keberanian untuk memikul tanggungjawab di luar zon keselesaan masing-masing bagi berhadapan dengan masyarakat.

"Ijazah yang diperoleh dari UPM bukanlah merupakan matlamat sesuatu ilmu itu dipelajari tetapi merupakan medium yang sangat bermakna untuk graduan memberi sumbangan dan khidmat bakti kepada masyarakat dan negara masing-masing.

"Setiap kepakaran individu ini harus digabungkan secara bersepadu untuk melonjakkan kecemerlangan negara dalam persada global," titah baginda dalam Majlis Konvokesyen Ke-38 UPM, Serdang dekat sini hari ini.

Yang turut hadir, Menteri Besar Selangor, Mohamed Azmin Ali dan Naib Canselor UPM, Prof. Datuk Dr. Mohd. Fauzi Ramlan.

Seramai 6,116 graduan terdiri daripada ijazah doktor falsafah (391), ijazah sarjana (2,123) dan ijazah sarjana muda (3,380) yang menamatkan pengajian menerima ijazah masing-masing dalam upacara selama empat hari itu.

Sementara itu, Sultan Sharafuddin turut mengingatkan setiap graduan agar menggunakan kejayaan dikecapi bagi memberi sumbangan kepada ibu bapa masing-masing yang telah berkorban untuk mereka.

"Beta percaya tiada yang lebih menggembirakan ibu bapa dan keluarga selain daripada dapat bersama-sama menikmati kejayaan yang dicapai oleh setiap graduan," titah baginda.

Baginda turut berharap graduan dari luar negara yang kini menjadi alumni UPM dapat memainkan peranan sebagai duta dengan meneruskan kecemerlangan dan menjaga nama baik universiti di peringkat antarabangsa.

"Semoga anda akan meneruskan kecemerlangan dan menjaga nama baik universiti, memberi nilai tambah kepada masyarakat global dan secara berterusan mengekalkan legasi kecemerlangan UPM," titah baginda.